

## Afahrt quer dür e Aargou / 4. Mai 2014

Scho die ganzi Wuche het dr Wätterbricht eim nid würtlech zu Jubel Alass gä. Ir Nacht vom Samschtig uf e Sunntig het's de gar Bodefroscht gä.

Nichts desto trotz hei sech e paar unerschrockeni CCBler (Hene, Bruno, Pierre, Jasmin, Marlise, Vera, Urs, Chimu u Werner) am morge am achti ds Chiese vor em Löie troffe, für zäme - bi sage u schreibe ganze 6 Grad(?) - uf das Willisou z'fahre (Usgangspunkt für die hüregi Afahrt). Isch das e Schiss-Chäuti gsi!

Bim Sport Rock Café acho, het me üs schier müesse vom Töff abschla, wöu mr bimehaar agfrore si gsi.

Während die Einte ar Wäirmi ihres Gaffee gschlürft hei u langsam uftouet si, hei sech na-dis-na o die Andere igfunde (Housi, Hanspeter, Röbu, HP, Tinu, Ändi, Bärnu u Märku). - Hätte die Manne Schnöiz treit, die wäre ne miseeu abbroche, so chaut isch gsi.

So het sech de e stattlechi Azahl vo 17 Töffe a d'Färsch, oder besser gseit a Uspuff vo Housi gheftet, für dä "Luzärner/Aargouer" gah z'erchunde. Uf herrleche Näbesträssli het nis Housi zeigt, dass es o i angere Gägende vor Schwiz Kurve git, wo's schön isch se z'nä. Ime gäbige Tämpo (so dass die Hingerschte nid grad permanänt hei müesse dr Schegg use ha ;-) hei mr dä Landstrich erchundet.

Mir si de glichwou aui froh gsi, wo's ir beheizte Aupwirtschaft Horbe es warms Zmittag het gä. D'Biise isch is nämlech uf der ganze Fahrt um d'Nase gchutet u d'Sunne (wo Housi zwar bsteut het gha) het me nis nume aube eis hurti zum gluschte gschbienzlet.

Üse Wäg het üs am Name de Richtig Langethau - Burgdorf i heimatlechi Gefilde gfüehrt. - D'Sunne het sech de angänds erbarmt u het üse Glichmuet gwüss no mit paarne Strahle belohnt. Wo sie isch fürecho, het's eim grad sofort 10 Grad wärmer tüecht. - Dankbar hei mr se bim letschte Zwüschehaut ds Madiswiu vor em Saloon gnosse, bevor mir dr Räschte Wäg hei unger d'Redli gno.

Ds Abstige bir Chrono ds Rubige - wo üs zum Abschluss dr Jörg und d'Ruth no es feins Zvieri offeriert hei →es hätzlechs Dankeschön dene beidne ← isch de o, im Gägensatz zum Morge, grazöis u gschmeidig vo statte gange.

Es isch trotz de afänglech froschtige Tämpere e gmögegi u derzue o no unfaufreii Afahrt gsi. Danke Housi für dä umsichtig, gröit Usflug.